

PUBLICO A KEDA HOPI EMOCIONA CU "NOS REGALO DI PASCO" PRESENTA PA DE TRUPIALEN



ORANJESTAD (AAN) - E show tabata precioso. E publico a haya un regalo impagable, yama precisamente "Nos Regalo di Pasco" presenta pa De Trupialen. Despues di e discurso di apertura door di e presidente di De Trupialen, e banda a toca dos cancion, a sigui pa e cantica "Kloknan di Pasco" canta pa Tanisha Graigg hunto cu e coro hubenil.

E banda a sigui toca te 8'or cu ta e momento cu e cena a cuminsa.

Pa 9'or di anochi e show a duna inicio, presentando na prome lugar e chiquitonan.

Sidney Simmons a habri e show cu e cantica "E burico di San Hose", Veronique Moreta a sigui cu "E Niño Dios", Nicole Henriquez a interpreta "Ata Pasco" sigui pa Kristine Moreta cu e cantica "E Yiu di Maria" y "Ban Celebra" canta pa Liz Marie Kraanwinkel.

Un presentacion sublime cu a ranca hopi aplauso y a pone e publico emocionan masha hopi mes di mira e criaturanan aki, hopi sigur di nan mes, regala asina tanto talento.

Como invitado special tabata Loraine Flores, ken a canta "Jesus Mi Buen Pastor".

E escenario a worde ocupa e biaha aki pa e grupo Hubenil di De Trupialen, cu ta consisti di Monique Croes, cu a canta "Pasco lo reina", Sinny Solagnier cu e cantica "Esnan Lubida", Richeline Rasmijn a interpreta "Bon Bini Nos Salbador", sigui pa Jennessee Donata cu e cancion "Reflexion di Pasco", "Mas Alla" canta pa Milicent Alvarez, despues Sinny Solagnier a canta "Cerca e Niño Dios" y a finaliza cu e cancion "Nos ta celebra" den e voz di Jennessee Donata.

Seguidamente señor Toi Donata a



interpreta Nostalgia Navideña (sinfonia di boca).

Pa conclui e show e coro di adultonan a canta Niño Lindo, Potpourri nr.1, Esplendida Noche, como solista Mario Tromp a canta "Amor di Leu", a sigui cu un presentacion di poppenkast di e cancion tan conoci "Silver Bells", despues e coro a interpreta su potpourri nr.2, Nos Paranda di Aña Nobo compone pa Lem Pieters, y a conclui cu

Rindo mi corazon.

Pa cera cu broche de oro e presentacion De Trupialen a regala nos publico su trmendo Dande, pa sigui despues cu e fiesta bailable. Masha pabien na e streanan chiquito, mediano y grandi di De Trupialen cu a sa di tene un anochi inolvidable, y cu merece elogia pa e manera con nos mucha y hobenan ta worde instrui den musica na un forma asina profesional y unico.

